

<><><><><><>

Headlines

1. प्रधानमंत्री नरेन्द्र मोदी होरें आखेआ जे पहलगाम आतंकी हमला मुल्खै दी नारी शक्ति लेई इक चुनौती हा ते एह इस हमले दी साजश रचने आलें आस्तै मौती दा सनेहा साबत होआ ऐ।
2. पैहली पैहली चेरी कार्गो रेल अज्ज कटड़ा रेलवे स्टेशने थमां मुंबई लेई रवाना होई।
3. सरकारै कल्लै थमां उत्तरी रेलवे तैहत जम्मू गी इक नमीं रेल डिवीजन दे तौर अधिसूचत कीता ऐ। एहदा सदर दफ्तर जम्मू तवी होग।
4. ऐतिहासक मुगल रोड, पीर की गली च ताजा बर्फबारी करी ट्रैफिक दी आओजाई लेई आरजी तौरा पर बंद करी दित्ती गई ऐ।
5. अज्ज पूरी दुनिया च विश्व तम्बाकू नोशी ध्याड़ा मनाया जा'रदा ऐ। एहदा मकसद तम्बाकू दे माड़े प्रभावे बारे जागरूकता पैदा करना ऐ।

<><><><><><>

प्रधानमंत्री नरेन्द्र मोदी होरें आखेआ ऐ जे पहलगाम आतंकी हमला भारत दी नारी शक्ति गी इक चुनौती ही ते एह इस हमले दी साजश रचने आलें आस्तै मौती दा सनेहा साबत होआ ऐ। प्रधानमंत्री होर अज्ज मध्यप्रदेश दी राजधानी भोपाल दे जम्बूरी मैदान च लोकमाता देवी अहिल्या बाई होल्कर हुंदी 3 सौ मीं जयंति दे मौके पर आयोजित नारी सशक्तिकरण महा सम्मेलन च बोला'रदे हे। प्रधानमंत्री होरें आखेआ जे भारत कुसै किस्म दे परोक्ष युद्ध गी बर्दाश्त नेई करोग ते देसै नै इस चाल्ली दिएं आतंकी कारवाइएं कन्नै सख्ती कन्नै निबड़ने लेई पक्क ध्यायी दी ऐ। प्रधानमंत्री होरें आखेआ

<><><><><><>

जम्मू कश्मीर च इक ऐतिहासक पैहल दे तैहत जम्मू रेलवे डिवीजन नै बागवानी मैहकमे कन्नै रलियै अज्ज पैहली बारी कटड़ा रेलवे स्टेशन थमां मुंबई तगर चैरी कार्गो पार्सल वैन गी रवाना कीता। अज्ज भेजे गेदे कार्गो कोचें च 24 टन ताजी ते उच्ची गुणवत्ता आली चैरी जम्मू कश्मीर थमां बाहर भेजी गई ऐ। उआं चैरी आली इस कार्गो पार्सल वैन नै 3 जून गी कटड़ा रेलवे स्टेशन थमां रवाना होना हा पर फल उत्पादकें दी भारी मंग गी दिखदे होई इसी अज्ज गै रवाना करी दित्ता गेआ। इस पैहल दा मकसद तौले खराब होने आली चीजें गी सेही सलामत जम्मू कश्मीर थमां बाहरले राज्यें तगर पजाना ऐ तां जे मकामी करसानें ते फल उत्पादकें गी एहदा लाह पुज्जी सकै। इस बारे आकाशवाणी समाचार कन्नै खास गल्लबात दरान जम्मू रेलवे डिवीजन दे वरिष्ठ डिवीजनलकामर्शियल मैनेजर अचित सिंघल होरें आखेआ

<><><><><><>

Jammu Rail Division

रेल मंत्रालय नै घोषणा कीती ऐ जे पैहली जून 2025 थमां जम्मू इक नमां रेल डिवीजन बनी जाग जेहदा सदर मकाम उत्तर रेलवे दे तैहत जम्मू तवी च होग। एह नमीं डिवीजन फिरोजपुर डिवीजन च बनाया गेआ ऐ ते एहदे च पठानकोट-जम्मू-श्रीनगर-बारामुला जनेह महत्वपूर्ण रूट शामिल न। एह घोषणा 29 मई गी इक गैजेटड अधिसूचना दे राएं कीती गई ही ते 6 जनवरी गी प्रधानमंत्री नरेन्द्र मोदी होरें इस डिवीजन दा वर्चुअल रूपै कन्नै उद्घाटन कीता हा। फिरोजपुर डिवीजन दे अधिकार खेत्तर गी इस फैसले दे बाद नमें सिरिया संशोधित कीता

गेआ ऐ। नमें जम्मू डिवीजन ते फिरोजपुर डिवीजन बश्कार सीमा जलंधर-पठानकोट सेक्शन ते अमृतसर-पठानकोट सेक्शन पर होंगन।

<><><><><><>

जिला प्रशासन सांबा नै इसलै चला'रदे पर्यावरण हफ्ते 2025 दे समारोहें दे इक हिस्से दे तौरा पर प्लास्टिक प्रदूषण दे बारे इक व्यापक कार्यशाला दा आयोजन कीता। इस मौके पर सांबा दे जिला विकास कमीशनर राजेश शर्मा मुख्ख परौहने हे। इस कार्यशाला दा मकसद ग्रामीण विकास विभाग दे अधिकारिएं दे समर्थ दा निर्माण करियै उनें गी लोड़चदा ज्ञान ते संदर-औजार मुहैया करोआना हा तां जे ओ अपने अपने इलाकें च पर्यावरण च सार्थक बदलाव करी सकन। इस पैहलकदमी दा मुख्ख लक्ष्य बघदे प्लास्टिक प्रदूषण बारे जागरूकता बधाना ते कन्नोकन्नी अधिकारिएं गी ओहूके समुदायें च जाइयै सतत ते टिकाऊ जीवन शैली अपनाने लेई असरदार तरीकाकार दे विकास लेई प्रेरित करना हा

<><><><><><>

Mughal Road Closed

अज्ज होई दी ताजा बर्फबारी करी ऐतिहासक मुगल सड़क गडिडएं दी आओजाई लेई एतियातन आरजी तौरा पर बंद करी दित्ती गेदी ऐ। एह सड़क इक वैकल्पिक राश्ट्रीय जरनैली सड़क ऐ जेहड़ी जम्मू डिवीजन दे दऊं जिलें राजौरी ते पुंछ गी कश्मीर डिवीजन दे शौपियां जिले कन्ने जोड़दी ऐ। आकाशवाणी जम्मू दे संवाददाता दी रिपोर्ट मूजब सुरनकोट दे एसडीएम फारुक खान होरें दस्सेआ जे पीर की गली च ताजा बर्फबारी ते बड़ी मती बरखा होने करी "मुगल रोड" ट्रैफिक दी आओजाई लेई आरजी तौरा पर बंद करी दित्ता गेदा ऐ। मुगल रोड ट्रैफिक दे इक अधिकारी माहरूफ अहमद होरें दस्सेआ जे बर्फबारी करी एहतियातन मुगल सड़कै गी बंद करना पेआ। लोकें गी सलाह दित्ती जंदी ऐ जे ओ उच्चर मुगल सड़कै पर नेई जान जिच्चर इसी ट्रैफिक दी आओजाई लेई खोली नेई दित्ता जंदा।

<><><><><><>

No Tabacoo Day

अज्ज विश्व तम्बाकू नोशी दिवस ऐ। इस मौके उप्पर विश्व सेहत संगठन आस्सेआ तम्बाकू-रोधी गी रोकने आस्तै ते एहदे कन्नै होने आले खतरें बारे जानकारी देने लेई दुनिया भरै च कार्यक्रम आयोजित कीते जंदे न। इस ब'रे दा विषेसार ऐ-तम्बाकू ते निकोटीन उत्पादें पर उद्योगें दे दाव-पेचें गी उजागर करना तां जे बक्ख-बक्ख किस्में दे ते पैकटें ते जायकें च औने आले इनें तम्बाकू उत्पादें दे खतरे बारे लोकें गी जानकार बनाया जाई सकै। आकाशवाणी समाचार कन्नै गल्ल करदे होई एम्स नमीं दिल्ली च फेफड़े दी बमारिएं सरबंधी डाक्टर कर्ण मदन होरें दस्सेआ जे तम्बाकू दा कुसै बी तरीके कन्नै सेवन शरीरै गी बड़ा नुक्सान पजांदा ऐं उनें आखेआ

<><><><><><>

जम्मू कश्मीर च बी अज्ज तम्बाकू निषेध दिवस मनाया गेआ। उधमपुर जिले च एहदे बारे जागरूकता फैलाने दे मकसद कन्नै केई कार्यक्रमें दा आयोजन कीता गेआ। मुख्ख कार्यक्रम जिला अस्पताल च करोआया गेआ जित्थें सरकारी मैडिकल कालेज उधमपुर दे विद्यार्थिएं तम्बाकू शा दूर रौहने द'ते सब्बने गी एहदे माड़े असर बारे जानकार बनाने गी सगंध चुक्की। इस मौके पर इक रैली दा बी आयोजन कीता गेआ तां जे मकामी लोकें गी तम्बाकू मुक्त जिंदगी जीने लेई प्रेरित कीता जाई सकै। इस मौके पर बोलदे होई जीएमसी उधमपुर दे मैडिकल सुप्रीटेंडेंट डॉ. संजीव गुप्ता होरें आखेआतोआई इयै नेया इक कार्यक्रम कठुआ च बी आयोजित कीता गेआ जेहदे च एएनएमटी स्कूल दे विद्यार्थिएं समाज च तम्बाकू दे सेवन शा होने आले खतरे बारे जागरूकता बधाई। इस मौके पर आकाशवाणी समाचार कन्नै गल्ल करदे होई जिला सेहत अधिकारी डॉ. उत्तम कुमार होरें आखेआ

<><><><><><>

IPL

आईपीएल क्रिकेट च कल रातीं चंडीगढ़ दे महाराजा यादवेन्द्रसिंह अंतर्राष्ट्रीय क्रिकेट स्टेडियम च एलीमिनेटर मकाबले च मुंबई इंडियन्स नै गुजरात टाइटंस गी 20 रंजें कन्नै हराइयै क्वालीफायर-2 च थाहर बनाई लेई ऐ। पैहले बल्लेबाजी करदे होई मुंबई इंडियन्स नै तैह 20एं ओवरें च 5 विकेटें दे नुकसान च 228 रंज बनाए। परते च गुजरात टाइटंस 6 विकेटां मोआइयै 208 रंज गै बनाई सकी। इस जित्त कन्नै मुंबई इंडियन्स क्वालीफायर-2 च पुज्जी गई ऐ ते ओहदे खिताब जित्तने दियां मेदां बरकरार न। दूई बक्खी गुजरात टाइटंस शानदार प्रदर्शन दे बावजूद प्रतियोगिता शा बाहर होई गई ऐ।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी जम्मू कश पंजीतीर्थी 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>